



18. oktober 2019

UKA 2019/121
Aqqalu C.Jerimiassen

Århuskonventionimut Namminersorlutik Oqartussat ilanngutissappata allaffissornikkut aningaasatigullu kingunissaasa qulaajarneqarnissaannik Naalakkersuisut kingusinnerpaamik UKA2020-mi Inatsisartunut saqqummiunneqartussamik suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Stine Egede, Inuit Ataqtigiit)

Tamatta ataasiinnarmik anguniagaqarpugut. Tamatta tamavitta soqutigisarput ataasiinnaviuvoq. Tassaavorlu inuujumalluta atugassagut pitsanngorsarusullugit. Aqqutit sorpassuit atorsinnaavagut anguniagaq taanna piviusunngortikkumallugu. Ulluinnarni toqqagassat akornanni aalajangernitsigut, siunissamilu atugassariumaagassagut takorluukkatsitut anguniarumallugit.

Partii sorliugaluaruttaluunniit, isitta qalipaataat suugaluarpalluunniit, nunaqarfimmiugutta, Ilulissaniikkaluaruttaluunniit ullumikkut, aqagu, siunissamilu ungasinnermi atukkatta pitsanngorsarnissaat suliariumavarput.

Tamattalu aatsitassarsiorumalluta aalajangernikuuvugut suliffissaqartitsinissaa, avammullu tunisassiarinissaa neriuutigalugu. Qanorlu taakku takorloorutit piviusunngortissallugit, aqqutillu sordiaat atorlugit taakku angussanerigut assortuussutigisarparput.

Suut ulorianarnersut suullu uloriananginnersut uteqattaarujorsinnaavagut. Immaqaluunniit immitsinnut naaperiarsinnaavugut annerpaamillu isumaqatigiissutigisinnaasatsinnik ujartuilluta. Nipituuliorsinnaavugut, kinamita nillianeq. Immaqa eqqarsarluta nipitunerup kissaatini pisinnaassallugit, tusaaneqarnerullunuunniit.

Siunnersuuteqartoq tusaavarput, taakkulu Århuskonventionimut peqataalernissamut nunatsinni amigaatigut atuutilernissaannut oqariartuuteqarmat. Naalakkersuisullu tusaavagut taassuma isumaqatigiissutip imarisai annertuumik nunatsinni atuutereersut, sinnerisalu atuutsinnissaanut amigaataasut annertuumik allaffissornikkut pisarissersuutaasussatut aningaasartuutaasussatullu kisitsisiliinertaqaqngikkaluartut ilimasaarutigaat.

Tamattavitta peqqissutsimut, inoqarfiusunut, pinngortitamut, inuussutissarsionermullu innarliinngitsumik aatsitassarsiornissap ingerlanneqarnissaa kissaatigaarput. Siunnersuutip oqariartuutigaa Århuskonventionip tamakkiisumik atuutilersinnaaneranut allaffissornikkut aningaasatigullu kingunissai suunersut paasiumallugit. Taassumallu inerneriumaagassai nalugatsigit suunersut, ilumut Århuskonventionip tamakkiisumik atuutilernissaanut aalajangersinnaangikkallaratta, siunnersuut taperserlugu ataatsimiititaliamut innersuupparput.